


20. 049.

1320

A highly detailed, symmetrical floral border surrounds the central text. It features intricate scrollwork, acanthus leaves, and various flower motifs, creating a classic, decorative frame.

**AWIG AWIG  
DESA ADAT  
KEBUNG**

DIPERBANYAK DAN DIPERSEBAHKAN  
OLEH  
K. KEBEK SUKARSA

## PEMAHAH

Om maka tungtung pangastawan titiang krama Desa Kebung sareng sami, ngatpada tur nguyu-uyubuk padan paduka Sanghiang Jagat Karama, Ida sang prasidha maka sangkan paraning jagat tiga, rauhing sarwwa wastu, makadi sarwwa mahuripe maka sami, tur Ida kalektah maangga sanghiang ong karat mantra, miwah maka sari sarining weda mantra miwah tuture sami.

Gumanti wantah Ida asung kreta wara nugraha ngicen pamargi mahawanan prasidha nemu bhukti mwanng mukti miwah karahayon, makadi kadhirgha yusan. Awanan tan mari Ida sane murdayang tur satata linggayang titiang ring siwa dwara, sembah titiang rahina wengi samangdene nemu sidha ning don, indik titiang krama desa sareng sami ngiket Awig-Awig Desa Adat Kebung sane gumanti pacang angge uger-uger, ajeg-ejeg miwah sipat siku-siku patitis, sane rumaga dasar pamikukuh Desa Adat Kebung ring tepengan mangulati kahita wasanan, miwah pasukretan Desarauhing kula wargga krama Desane samian. Punika larapan ipun ring rahina nuju "Anggara Kliwon Wara Prangbakat" tanggal ping 13 sasih ke 5, rah 7, tenggek 3, icaka 1903 krama Desa Adat Kebung watra tdun mapahem marembug, guluk briuk sapanggul, tur sapulung nyikiang tatujon, ngiket paswara, ngawangun Awig-Awig Desa Adat Kebung maka panyanggraha ngiket krama Desa ring tepengan mapolah, maprawerti, kandugi sidha kapangguh tuntunging tatujon Desa kreta rahardja.

Awig-Awig puniki, kaiket madasar miwah mateteken antuk :

1. Pancasila, kadi amungguh ring pemahbah U.U.D. 1945.
2. Undang-Undang Dasar 1945 pamoat/pamekas pasal 18.
3. Imba Awig-Awig Desa Adat ring Bali sane kawedarang antuk Jawatan Agama Hindu dan Buddha Propinsi Bali.
4. Lingning sastra agama Hindu.
5. Dresta-Dresta, sasana-sasana, kalih pamargi-pamargi sane tan mem-pas saking gagewet dharma, sane katani saking nguni.
6. Peraturan-Peraturan Pemerintah.

### TATUJUN AWIG AWIG PUNIKI

1. Negegang tur mikukuhin Sanghiang Agama.
2. Ngematmiang tata kramaning meagama.

3. Ngerajegang pasukretan Desa, rauhing pawongania sami, sakala niskala.
4. Negegang pasukretan saraja drewen Desa, miwah saraja drewening pawongania sami.
5. Negegang miwah mikukuhin pamarggi remba-rinemba, sih kumasih salulung sabhayan taka, ring tepengan mabasa wirang, marep ring krama Desa Adat Kebung.

Dumadak lajer sih Ida Sanghiang Widdhi Wasa, satata asung lugaraha ngicen pamaggi galang apadang, kandugi kapangguh, Awig-Awig puniki sidha maka panyanggraha pasukretan, miwah kahitam wasanan Desa rauhing krama Desa samian, kantos kawungkur wekas.

Om Sddhir Astu Tatastu Astu.

Om Santih Santih Santih.

## AWIG- AWIG DESA ADAT KEBUNG

### SARGGA . I

#### PAWOS . 1.

1. Desa Adat puniki, mawasta Kebung, mawit saking kruna lingga "Bunga" polih pengater "ka" dados Kanguna Kasuen suen lingganipun ical, tur kaloktah kasebut "Kebung".

Manut lekita miwah babad kalih dresta-dresta sane wenten, yata kocap saking duk rajeg Kerajaan Geger, sapanyeneng Ida Dalem Di Made, icaka 1505 Masehi 1663, palemahan inucapingajeng, maka pe-alas alasan wit sekar, katon dahat langa ngayunyunin, riantuk pannedeng nyane isekar warna warni, sane satata nudut kahyun sang manyingak. Sawinaning wit sekar sane mategepan, kadi umungguh ringajeng, wenten taler wit tingkih, sane kabaos wohyane luwat tur ngales, awanan kasub kesontrah rauh kadura desa, kandugi wit tingkih inucap kawastanin ibelulang.

Punika maka larapan palemahan inucap kasungkemin antuk Dalem Gelgel, tur maka palemahan kekeran Dalem.

Duaning asapunika awanan Dalem mangutus tosning babecik tereh pasek Gelgel, sane mawed sang Jro Kapal, sane masanak tatiga : Sane Wayahan tumekoh ring Jro Kapal, sane panoman angungsi tur tumekoh ring Prabumian Manduang, angameng Bale Agung, sane pinih alit maka Papatih Dalem, saha punika sane kautus antuk Dalem, nyanggraha miwah midabdabin pealas alasan inucap, saha kaicen keris, sane kasambut ring Tegalinggah Klungkung, maka sadana mangulati pasukkretaning palemahan kekerang Dalem ringjeng.

Reh sotaning papatih sayang, tur maka pikandel pangemban Dalem, sane kapercaya pacang nyanggraha pe alas alasan inucap, awanan magentosin aran, maharan I Sarawana, sane mateges "kasuksara ngawiwenang pe alas alasan " Kasuen suen I Pasek Sarawana tumekoh ring palemahan inucapingajeng, awanan Dalem malih maregteg ngutus watek babacik, maka pangremba nulingayang miwah sareng midabdabin kalengutan, keasrian nyane ipealas alasan, lwire : Pasek Tutuan Pasek Salin, miwah Pula Sari, magunggung kwehnyane ngantos patlikur diri. Rehing tumekoh rumaga pangemong wawidangan lalemah inucap, mawastu ring gelis mapawangun pura-pura makastanan Sang-

hiang Widdhi, sane kanggeh panguluning Desa. Sapunika mimitan ipun, Desa Adat Kebung.

2. Desa Adat inucap gumanti wantah kanggeh pasayuban krama Desa rauhing kula warga pawonganyane.
3. Desa Adat Kebung, mawed wiyadin mabongkol antuk Banjar Pepaturan, sane mapalih dados kalih Banjar, lwire : Banjar Kangin miwah Banjar Kawuh.
4. Banjar inucap taler malih maepah dados petang tempek, soangsoang Banjar, lwire :
  - a. Tempek Kangin.
  - b. Tempek Kelod.
  - c. Tempek Kawuh.
  - d. Tempek Kaja.
5. Mungging suter Desa Adat Kebung mawates nyatur Desa, kadi inucap ring sor puniki :
  1. Wates sisi Kangin Desa Adat Telengan/ring Bukit Musu.
  2. Wates sisi Kelod Desa Adat Telunwayah, ring Pungutan miwah Celatiga.
  3. Wates sisi Kawuh Desa Adat Tebola/ring Bukit Panelokan.
  4. Wates sisi Kaler Desa Adat Iseh/ring Bukit Panglapu.

#### PAWOS . 2.

1. Kuwub wawidangan Desa Adat Kebung manut dresta lwire :
  - a. Papupulan karang-karang pomahan, sinangguh palemahan Desa pakraman.
  - b. Katra, bangket - bangket, miwah sahananing pategalan-petegalan ring kuwub wawidangan Desa Adat Kebung, sawining palemahan Desa pakraman, kanggeh tur kakukuhang maka telajakan Desa.
2. Pe alas-alasan, tukad, miwah selawu, sane wenten ring sajroning jebag Desa Adat Kebung, prasideha rumaga payar Desa.

#### PAWOS. 3.

1. Awig-Awig, parareman, miwah sahananing pawaşran Desane, sane anut, tur tan mlemas ring daging Undang-Undang kalih peraturan peraturan Pemerintah Negara Republik Indonesia, manggeh kembang ring kuwub wawidangan Desane sami.
2. Awig-Awig, miwah parareman subak-subak, ring telajakan Desane, sane anut, tur tan mlemas kadi inucaping ayat 1, tanmari manggeh kategegang.

SARGGA.  
II  
WAWIDANGAN MIWAH TATERAPAN  
PAWOS. 4.

1. Buat wates wawidangan palemahan tempekan Banjare, kamanggeh-ang antuk pamutus paruman Banjar.
2. Manut ring munjuk lungsur cacah jiwane pepalihan tempek, rauhing wates wawidangannyane, wenang rrobah manut pamutus paruman Banjar.

PAWOS. 5.

1. Banjar miwah subak-subak wenang ngardi Awig-Awig, makadi parareman, maka pamikukuhanyane.
2. Awig-Awig miwah parareman, tas wenang nempas punapi malih matungkas ring Awig-Awig Desane, saha tan mari kalingga tanganin antuk Kelihan Desa Adat, maka pamikukuh, kandugi dados kelaksanayang.

PAWOS . 6.

1. Sahanan Tempek tan wenang ngardi Awig-Awig, miwah pasangkep an/parareman.
2. Duaning Tempekan Inucap, madewek pepalihan, tur sinangguh tangan sukuning Banjar.

SARGGA. III  
PRAJURUN DESA

PAWOS. 7.

1. Sane kasinenggeh Prajuritun Desa lwire :
  - Bendesa = Ketua Umum.
  - Ngukuhin = Ketua I
  - Penyarikan Desa = Sekretaris.
  - Sedahan Desa = Bendahara.
  - Dangka, Salin, miwah sane sios = siosan.
2. Sawinaning prajuritun Desa inucapingajeng, wenten taler palima-palimanyane, sane rumaga pangeremba prajuritun inucap.
3. Kabayan Desa lwire : para Pemangku sane rumaga jan banggul

Kahyangan Desa, sakadi :

- Pemangku/jan banggul Pura Puseh
- Pemangku/jan banggul Pura Dalem
- Pemangku/jan banggul Pura-Pura Desa siosan.

4. Kelihan Banjar miwah Tempek, kanggah pametit ringajeng, antuk Prajuritun Desane inucap, tur rumaga titi sane patut pacang nyambung/ngerauhang salwir pakerab Prajuritun Desane marep ring krama Desane sami, sawidangan Desa Adat Kebung.

#### PAWOS. 8.

1. Sahananing Prajuritun Desa, makadi Kabayan sane kanggah jan banggul Kahyangan Desa, kapatut :
  - a. Mawed saking Desa Adat Kebung, tur sampun makrama Desa Marep/bulangkep
  - b. Bakti ring Ida Sanghiang Widdhi, salunglung ngematmiang tur negegang Pancasila sane maka dasar Negara Kesatuan Republik Indonesia, manut ring pemahbah U.U.D. 1945.
  - c. Mepemargi rahayu, utawi tan nahen ngeracinin Desa, ye ke ring buat patesunan, ye ke ring buat urunan, sane sampun kapatut tur kaputusang antuk paruman/sangkepan, jawat Tempek, Banjar, lewihnyane Desa.
  - d. Madue pauning, ring tepengan pemargi miwah pikandan-pikandan adat, manut dresta-dresta sane tan mēmpas ring agama Hindu.
2. Prajuritun Desa inucap, sawinaning Kabayan Desa, keadegang mangda melarapan antuk sasudian/pemilihan sane gumanti ugi kawentenang antuk paruman Desa, Banjar, miwah Tempek, rumaga cihna jati-jati kamomotang antuk krama Desa, Banjar miwah Tempek.
3. Sasudian/pemilihan Prajuritun Desa, prasidha kabaos sah, yan sampun polih swara rangkung ring atenga, saking gunggungan krama Desane samian.

#### PAWOS . 9

1. Kabayan Desa keadegang ngelintangin kalih pemargi lwire :
  - Sasudian krama Desa, kadi umungguh ring ayat 3, pawos kaping 8 ringajeng.
  - Turunan maka jan banggul, sane kapatut antukkrama Desa.
2. Buat wewanengan pacang dados Kebayan Desa , lwire :
  - Sampun tutug tuwuh, utawi sanenten ipun matuwuh 35 tahun
  - Sampun bulangkep.

- Sampun makrama Desa.
- Mapargi rahayu.

#### PAWOS. 10.

1. Prajuritun Desa, kasanggraha antuk pelima pelimanyane, sane gumanti rumaga petanganyane soang-soang, lwire :
  - Petêngan Bendesa.
  - Petêngan Penyarikan Desa.
  - Petêngan Sedahan Desa.
  - Miwah petêngan-petêngan siosan, sane kabuatang antuk Prajuritun Desa.
2. Buat akweh kedik gunggungang petêngan inucapingajeng, manut kabutan Prajuritun Desane.
3. Petêngan-petêngan inucap, kasudi antuk Prajuritun-Prajuru Desa.

#### SARGGA. IV SWADHARMANING PRAJURU MIWAH KABAYAN DESA PAWOS. 11. PALET. 1.

#### PRAJURUN DESA

1. Prajuritun Desa kapatut ngemargiyang swadharma kadi ring sor puniki, lwire :
  - Ngenterang patedunan-patedunan, perareman/pesangkepan-pesangkepan Desa Adat, Banjar miwah Tempek-Tempek.
  - Nulinga tur ngeraksa saha nabdab pamargine ngangge drewen Desa, miwah Banjar.
  - Ngematmian miwah mageg<sup>ij</sup>ang, kalih ngelaksanayang daging Awig-Awig, miwah kaputusan-kaputusan parareman/pesangkepan Desa.
  - Nuntun tur nulingayang krama Desa rauhing kula wargganyane agulati kasukretan sakala niskala.
  - Nulinga, nuntun, makadi nyaksinin pamargi-pamargi upacara panca yadnya, sane kamargiyang antuk krama Desane, samangdene napakin dresta-dresta, sane manut lingning sastra agama Hindu.
  - Nuntun saha ngenterang krama Desa rauhing kula wargganyane, mangda tegeg ngematmiang tur ngamomotang Sanghiang Agama



miwah kasucian-kasucian Kahyangan<sup>2</sup> Desa, sabacakan sane kanggeh stan-an-stanan Widdhi, rauhing sahananing pralingga, pratima-pratima, kasucian bejin Desa, Kasucian pawengan, kasucian palemahan, miwah tata caraning ngangge ksetra.

- Mawesin tur niwakang pamutus-pamutus, marep ring tepengan pitungkas-pitungkas, miwah wicara-wicara krama Desane, mangda manut ring daging Awig-Awig, makadinyane tan mapilih kasih, wiyadin mapailon.
  - Meraga wakil Desa miwah Banjar matemuang bebaos majeng ring sapasira ugi.
2. Buat tata cara ngemargiyang swadharma ringajeng, keaptiang mangde satata ngenapakin sakadi manut ring Awig-Awig, pareraman<sup>2</sup>, dresta<sup>2</sup>, miwah pamutus pareraman/pesangkepan, sane sampun kapatut tur kabriyukin antuk krama Desa miwah Banjar rangkung ring Stenga.
  3. Pamargi ringajeng patut kedamiyakang ring paruman Desa utawi Banjar, samangdene prasida Watra krama Desa kalih Banjar, madue pauning galang apadang ring pamutus paruman Desane.

#### PAWOS. 12.

11. Simalih tunggil yan wenten Prejurun Desa mampas ring tepengan ngemargiyang swadharmakadi umungguhing ajeng, yogia kapitungheh antuk krama Desa, semangdene Prajurun Desane eling ring swadharma sane patut kamomotang.
2. Yan sampun kapitungheh antuk krama Desa, prade tan ngentosin solah miwah laksananyaane ngantos ping tiga, wenang kabaosin antuk Desa. tur patut kararyanang.

#### PAWOS. 13.

##### PALET. II

##### SWA DHARMANING KABAYAN DESA

1. Sahananing Kabayan Desa kapatut ngemargiyang swadharma kadi ring sor puniki :
  - Nabdab miwah ngunjuk lungsurang pahaci aci ring pura kahyangan Desa, manut daging Awig-Awig, miwah dres-dresta sane tan mampas ring lingning sastra agama Hindu.
  - Ngerisakin Pura-Pura Kahyangan Desa.
  - Nyiyasin/makemi abah-abah ring palinggih-palinggih Purane samian.
  - Nurun, ngiyasin, ngawangsuh pralingga, pratina-pratina, makadi nyimpen ring gedong.

- Ngunggahang toya anyar, dupa, makadinyane nganteb canang, miwah salwir aturan krama Desane.
  - Nulinga slwiring karusan-karusan pelinggihe ring Pura Kahyangan Desa, saha ngerauhang/nyupeksayang ring Prajuritun Desa semangdene gelis kapahayu.
  - Nabdab, nuntun, saha ngenterang ikrama Desa, ring tepengan nyanggraha pahaci-pahaci.
  - Masegeh mangken purnama tilem, miwah rikala rahinan rahayu siosan.
  - Ngaturang, saha mikukuhin tata caraning Pancayadnya.
2. Swinaning swadharmaning Kabayan Desa, sakadi amungguh ringajeng, sahananing Pemangku kapatut :
    - Mawinten, kawintenin antuk Ida Sang Sadhaka.
    - Sahananing Pemangku, patut nyuci laksana, manuting sasanan Pemangku, saha tan mari neglaksanayang dasa sila miwah Pancasila.
    - Asoca/mabresih bresih, mapaheningan, sarwa bhaksa, apeya peya/mapepunyahan, makadinyane tan kawenangang anyelang semara dudu, lewih para dara.
  3. Rikalaning salih tunggil Kabayan Desa Kahantakan, patut keabeng<sup>ing</sup> ugi, tan yogia mapendem.
  4. Buat pamelas prabaya panelasnyane pameratekanyane patut kawijilang antuk Desa, amungring tepengan upakara kewanten.
  5. Yan wenten salih tunggil, Kabayan Desa mamurung, wenang kapi-tungeh antuk Prajuritun Desane yan kandugi angantos ping tiga kapi-tungeh, tan ngantos pamargi, wenang keraryanang.

#### PAWOS. 14.

#### PALET. III

#### SWA DHARMANING PALIMAN PRAJURUN DESA

1. Buat swadharmaning paliman Prajuritun Desa, wantah nyanggraha Prajuritun Desane,
2. Yan rikalaning salih tunggil Prajuritun Desa alangan makadi : kelungayan adoh, matepetin kula warga kageringan, wenang palimannyane ngentosin ngemargiyang wewenang Prajuritunne inucap.

#### SARGGA. V

#### WIWENANG PRAJURUN DESA MIWAH KABAYAN

#### PAWOS. 15.

#### PALET. I

## PRAJURUN DESA

1. Sahananing Prajuritun Desa patut polih pecatu, saking upon-upon tanah jawat bangket, miwahtegal duen Desa.
2. Luput saking urusan, jawat daging miwah reramon.
3. Polih teas rikalaning agrembat aci ring Desa.
4. Saha polihcacanangan duman.

### PAWOS. 16.

#### WIWENANG KABAYAN DESA

##### PALET. II

1. Sakatahing Kabayan Desa, kapatut polih pecatu, saking upon-upon miwah tegal duen Desa.
2. Polih daging mangge ngaturang pasegeh mangken dina rahayu
3. Luput saking urunan, jawat daging miwah reramon.
4. Polih teas rikalaning angrembat aci-aci ring Pura Desa.
5. Tur polih cacanangan duman.

### PAWOS. 17.

#### PALET. III

#### WIWENANG PALIMAN PRAJURUN DESA.

1. Sahananing paliman Prajuritun Desa, patut polih pecatu, satengah saking pecatun Prajuritun Desane.
2. Luput matengah saking urunan, jawat daging miwah reramon.
3. Polih teas satengah saking gungungan teas Prajuritun Desane, rikalaning angrembat aci ring Desa.
4. Saha polih cacanangan duman.

### SARGGA. VI.

#### KRAMA DESA

##### PAWOS. 18.

1. Sahanan sang jenek tumekeh magenah utawi ring wawidangan Desa Adat Kebung<sup>sinanggah</sup> krama Desa Adat Kebung.
2. Krama Desa inucap, kepalih dados tigang poos, lwire :
  - a. Kula warga sane meagama Hindu, tur sampun bulangkep/makuren, kabaos krama Desa ayah marep.
  - c. Krama Desa sane kari deha truna, kabaos krama Desa sesabu, utawi petajuh.
  - d. Sawinaning krama Desa inucapingajeng, prasida kabaos tamiyu.

## PAWOS. 19.

1. Sahananing krama Desa, inucapingajeng patut tedun makrama Desa.
2. Krama Desa ayah marep, yan sampun madue sentana kapurusa makuren, wenang ngundulang ring sentanane inucap, tur wenang ire-rama, keles saking paiketan peayah ayahan Desa, miwah Banjar, makadi Pamaksan Pura.
3. Sahananing krama Desa sesabu, yan sampun makuren, maheletan tigang sasih suennyane saking pakurene, wenang tedun;ne Banjar.
4. Yan wenten salih tunggil mamurung, kadi kejaraningajeng, wenang kabaosin antuk Prajurun Desa, tur patut kapidana, saha katiwakia danda, me ageng : Rp.

## PAWOS. 20.

1. Yan wenten anak saking dura Desa, rauh tur tumekkeh magenah ring sajabag wawidangan Desa Adat Kebung, kapatut :
  - a. yan anak meagama Hindu, tumekkeh masue tigang sasih, wenang katerag tedun makrama Desa kalih me Banjar, tur mangda sata-minutin saurah arih pamarggin krama Desa sane seosan.
  - b. Yan anak sios ring agama Hindu, tan kapatut katerag tedun makrama Desa miwah me Banjar, nanging wenang kakeninin urunan 2 maka panelas anggen mahayu Desa ring tepengan mangulati karahayen sareng sami, jawat marupa barang-barang, lewihta marupa jinah, manut pamutus perareman Desa.
2. Salih tunggal tamiu inucap tan minutin pemargin kadingajeng, wenang katundung antuk Prajurun Desa, tan kayogiyayang magenah-ring kuwuh Desa Adat Kebung.
3. Yan wenten prade krama Desa salih tunggil ngajak tamiune sane asapunika, tur saha ngewehin nyelang genah, prasida kapidana/kapisisip, saha tan mari patut katiwakin danda buat ageng aliting danda pamidésa nganutin pamutus parareman Desa.

## PAWOS 21

1. Mungging taterap ayah ayahan, miwah pakenin kenin, marep ring krama Desa, sakadi umungguh ring pawos 18 ayat 2 manut ung-gwan munjuk lungsur ipun kadi ring sor puniki :
  - a. Krama Desa marep gumanti mongkolin saurah arih, kadiang-ganing : patedunan, pa ayah ayahan, lewih pakenin kenin marupa urunan, jawat marupa daging/raja berana, miwah reramon
  - b. Krama Desa Panyele, kapatut amung ngawijilang urunan da-ging kewanten, nanging tan kapatut keni sabacakan patedunan jawat Desa miwah Banjar, reh tan madue pengayah.
  - c. Krama Desa sesabu/sekeha Taruna - Taruni, kanggeh pangrombo, maka patajuh krama Desa ayah marep, tan kapatut keni sabacakan urunan, jawat marupa daging, miwah reramon.
2. Yan wenten karyyan Desa sane mabuat, wenang ikrama Desa panyele, miwah sesabu, kasarad katedunang olih Prajuritun Desane, miwah Kelihan Banjare, samangdene nyarengin ngarombo, kandungi karyyan Desane inucap, prasida gelis puput.
3. Krama Desa sawinaning sane sampun kaundul/kasilidihinin antuk sentanane sane sampun makuren, yan sampun marupa rompot, punika patut kalokikain antuk Prajuritun Desa, tan kapatut sareng keni pa ayah ayahan. Mungging urunan, jawat daging miwah reramon weweg keni kadi inucapingajeng.

## PAWOS 22.

1. Sinalih tunggil yan prade krama Desa miwah kula warganyane, magingsir genah ka dura Desa ninggalin wawidangan Desa Adat Kebung, kapatut ikrama Desa inucap mangda :
  - a. Nyupeksayang raga ring Prajuritun Desa miwah Banjar, indike pacang ninggalin, melarapan ngemargiyang swadharman Peme-rintah, miwah pacang ngerereh karyya, lewih mangulati bhukti
  - b. Yan prade madue utang, makadi ngutangang ring Desa, ring Banjar, miwah ring ikrama Desa kapatut mangda nginggasang utangnyane sadurunge memarggi ninggal Desa.
  - c. Krama Desa inucapingajeng, wenang kakelesang saking paiket-an makrama Desa, nanging yan prade ka wungkur malih rawuh mawali ke Desa Adat Kebung, tur malih tumekeh magenah, kapatut krama Desa inucap, mangda nyupeksayang raga ring Prajuritun Desa, saha keaptiang mangda malih tedun makrama saurah arih, kading dangu.

2. Yan prade wenten krama Desa mamurug kadi inucapingajeng ka -  
patut :

- Kapidana antuk Desa, saha katiwakan danda, buat agung aliting desa, manut pamutus parareman Desa, tur kadasarin antuk lokika tri pramana, sakadi ; lekita, saksi, bukti, mangda rangkep/jangkep Saha matambah naur pangentug panelas ring Desa.

#### PAWOS 23.

1. Yan wenten krama Desa tan manuting pemarggi, lwire kadi ring sor puniki :

- a. Mepemarggi ngeracinin Desa, sakadi ; ngalepit lepit saraja drewen Desa, nura cara ring Desa, ngerabining wong arabi, ngerusak stri larangan, miwah sakalwir pamarggi nur/cara siosan.
  - b. Tan tinut ring tata cara miwah tata krama, tata susila, sane sampun kapatut, tur kaputus antuk Desa miwah Banjar, tur sering ngawentenang karicuan-karicuan miwah wicara-wicara kalih sering pitungkas-pitungkas sane tan nyandang tungkasang
2. Yan wenten prade krama Desa asapunika, patut kapituturin, miwah kawehin piteket-piteket sane patut tur mawasana rahayu antuk Prajuritun Desa, mawaneng kantos ping tiga.
3. Prade krama Desa inucap tan ngalingu piteket Prajuritun Desa, lewih nyane tan mamingtuhu mawaneng ngantos tigang sasih, tan ngesehin, solahnyane, wenang Prajuritun Desa, ngeladang krama Desane inucap, saking paiketan krama Desa miwah Banjar, saha Prajuritun Desane ngaturang ring Pemerintah, mangda muputang pikandanipun.

#### PAWOS 24.

1. Kramadesa sane kaeladang kadi inucapingajeng, saking Desa miwah Banjar prasida tan polih :

- a. Pasayuban saking Desa miwah Banjar.
- b. Tan polih bebagian raja brana saking Desa miwah saking Banjar

#### PAWOS 25.

1. Sahananing warga Desa sane sampun munggah truna truni, soang2 patut tedun ngayah, kawastanin sasabu truna truni.
2. Ayah truna truni puniki, kasikiang mangda marupa sekeha truna truni ring Banjarnyane soang soang.

3. Sasakrah truna truni sane wenten ring wawidangan Desa Adat Kebung, kapatutang mangda tedun nyekeha truna truni ring Banjarnyaane soang-soang, ngawit saking sampun kawastanin deha kalih truna (umur : 16 tahun, tepengan deha, 18 tahun tepengan truna).
4. Salah tunggil yan wenten truna miwah truni durung tedun nyekeha, wenang Prajurit Desa miwah Banjar, kasarengin antuk Kelihan truna truni mitungeh, tur manerag truna trunine inucap, mangda gelis tedun ma Nyekeha.
5. Sinalih tunggil yan prade wenten truna truni sane piwal ring teragan Kelihan, punika wenang kabawosin antuk Prajurit Desa, kalih Banjar tur patut katiwakin danda, miwah patut keatur ring Pemerintah.

## SARGGA VII.

### Swa dharmaning krama Desa PAWOS 26.

1. Sasakrahing krama Desa kapatut mangda :
  - Negegang, mikukuhin, daging Awig Awig, miwah pamutus-pamutus pasamuhan Desa, Banjar miwah Tempek.
  - Ngewangiang kasucian Kahyangan-Kahyangan Desa, miwah Pura-Pura sane wenten ring sajebag Desa Adat Kebung.
  - Dreda matuang tur salunglung makadi tindih ring Desa.
  - Satinut nahenin panas tis pemarggin among-amongan Desane.
  - Tan mari ngutsahayang mangulati kajagadhitan miwah pasukretan Desa.
  - Tan miwalin sapituduh Prajurit Desa, ring tepengan patedunan.
  - Negegang tur nyungkemin pemarggi remba rinemba, sih kumasih, samangdene nyidayang sadulur saparnaya marep ring sasakrah krama Desa sajebag Desa Adat Kebung.
  - Pamoatnyane mangda sida, salunglung sabayantaka, mabasa wirang tur tindih marep ring krama Desane samian.
2. Sasakrah sane kebaos tamiu kapatut :
  - Tinut ring tatiwak Prajurit Desa, ring tepengan mangupadi kasukretan Desa ring sakala.
  - Tan dados nungkasin sapamarggin Desane, yan sampun napakin Awig-Awig, lingning sastra agama Hindu, miwah dresta sane tan mampas saking kakedap agama inucap, tur mula katami saking nguni, makadi tan mampas ring daging UNDANG-UNDANG, miwah Peraturan-peraturan Pemerintah Negara Kesatuan Republik Indonesia.

3. Sasakrah truna truni sane wenten ring wawidangan Desa Adat Kebung, kapatutang mangda tedun nyekeha truna truni ring Banjar nyane soang-soang, ngawit saking sampun kawastanin deha kalih truna (umur : 16 tahun, tepengan deha, 18 tahun tepengan truna).
4. Salah tunggil yan wenten truna miwah truni durung tedun nyekeha, wenang Prajurun Desa miwah Banjar, kasarengin antuk Kelihan truna truni mitungeh, tur manerag truna trunine inucap, mangda gelis tedun ma Nyekeha.
5. Sinalih tunggil yan prade wenten truna truni sane piwal ring ta-teragan Kelihan, punika wenang kabawosin antuk Prajurun Desa, kalih Banjar tur patut katiwakin danda, miwah patut keatur ring Pemerintah.

## SARGGA VII.

### Swa dharmaning krama Desa PAWOS 26.

1. Sasakrahing krama Desa kapatut mangda :
  - Negegang, mikukuhin, daging Awig Awig, miwah pamutus-pamutus pasamuhan Desa, Banjar miwah Tempek.
  - Ngewangiang kasucian Kahyangan-Kahyangan Desa, miwah Pura-Pura sane wenten ring sajebag Desa Adat Kebung.
  - Dreda matuang tur salunglung makadi tindih ring Desa.
  - Satinut nahenin panas tis pemarggin among-amongan Desane.
  - Tan mari ngutsahayang mangulati kajagadhitan miwah pasukretan Desa.
  - Tan miwalin sapituduh Prajurun Desa, ring tepengan patedunan.
  - Negegang tur nyungkemin pemarggi remba rinemba, sih kumasih, samangdene nyidayang sadulur saparnaya marep ring sasakrah krama Desa sajebag Desa Adat Kebung.
  - Pamoatnyane mangda sida, salunglung sabayantaka, mabasa wirang tur tindih marep ring krama Desane samian.
2. Sasakrah sane kebaos tamiu kapatut :
  - Tinut ring tatiwak Prajurun Desa, ring tepengan mangupadi kasukretan Desa ring sakala.
  - Tan dados nungkasin sapamarggin Desane, yan sampun napakin Awig-Awig, lingning sastra agama Hindu, miwah dresta sane tan mēmpas saking kakeḍap agama inucap, tur mula katami saking nguni, makadi tan mēmpas ring daging UNDANG-UNDANG, miwah Peraturan-peraturan Pemerintah Negara Kesatuan Republik Indonesia.



## PAWOS 27.

### Wiwenang krama Desa.

1. Sasakrah krama Desa madue wiwenang, sakadi ring sor, lwire :
  - Polih pasayuban miwah bebagian pateh-pateh ring sajroning Desa Desa miwah Banjar kalih Tempek.
  - Dados mamilih miwah kapilih dados Kelihan Banjar, Tempek, kalih Prajuritun Desa.
  - Madue wiwenang nulinga, mitungeh, Prajuritun Desa, sane mepe-marggi mēmpas ring daging Awig-Awig, lingning sastra agama Hindu, dresta-dresta kadi inucapingajeng, undang-undang, miwah peraturan-peraturan Pemerintah R.I.
  - Madue wiwenang ngangkat, ngeraryanang Prajuritun Desa.
  - Madue wiwenang, ngangkat, ngeraryyanang Prajuritun Desa, yan sampun janten pratiyaksa kaiwangannyane, miwah tuwuh wreda, makadi kageringan.
  - Wenang nunasang pamatut, nunasang salwiring panelas-panelas sane meangge, mapawangun ring Desa, miwah sanelasing pahaci aci.

## SARGGA VIII.

### Panyanggrahan Desa Adat.

## PAWOS 27.

1. Mungging panyanggran Desa Adat marep ring krama Desa, lwire:
  - Nyungkemin tur sayang marep ring krama Desa samian.
  - Mapaweh pasayuban pateh-pateh ring krama Desane sami.
  - Ngutsahayang samangdene ikrama Desa mamanguh krahayon, miwah pasukretan, rauhing kula wargganyane sami.
  - Ngayomin sahananing krama Desa sane ngemargiyang tata cara-ning sabacakan panca yadnya, pamoat ring tepengan sangaska-raning sarira sane mabuat, makadinyane sane ngeninin paiketan sulur pakula wargan.

## PAWOS 28.

### Panyanggrahan Banjar miwah Tempek.

1. Sinalih tunggil krama Desa yan pacang ngawangun karya/yadnya, ala. miwah ayu keaptiang mangda masadok ke Banjar miwah Tempek, mapahembang ngesasihang sadurung dina karya.
2. Krama Desa wenang :
  - Ngedih pamuput karya ring krama Banjar.

- Nuduk patus, jawat mentah miwah rateng, manut dresta.
- Ngamedalang Jangu ring krama Banjar miwah Tempek, manut wibuh kinciting karya, pamekas mangda nganutin, nista, madyottamaning upakara.
- Wenang ngedih karya, nyarad Banjar rikalaning ngingsirang wangunan.

### PAWOS 29.

1. Yang wenten krama Banjar mesadok, pacang ngedih karya, nuduk patus, patut I Kelihan Banjar ring gelis ngerabang ring kramane samian.
2. Krama Banjar patut :
  - Tedun matulung ring sang madrewe karyane, saha makta gegawan manuting pamoat sang ngedih karya.
  - Ngawijilang patus manut dresta.
  - Matulung ngambil saraja karya, sane dados among-amongan Banjar kantos puput.
  - Yan pitra yadnya, dados nuduk patus, yan pacang ngaben, miwah ngaroras, sawinaning punika tan wenang.
  - Krama Banjar, Desa, Dadiya, tan dados pacang ngusak asik, punapi malih nyengkalen, tata caraning yadnya, pamekas wantah keaptiang mangda sida yadnyane rahayu ngelantur.
  - Yan rikala krama Banjar, Desa, Dadiya, mangrembat sawa, tan kedadosang ngumpag ampig.
  - Yan prade wenten mamurug kadingajeng, wenang kapidangatur katiwakin danda olih Kelihan Banjar, miwah Prajurun Desa, dandane ngeranjing, ke Banjar sabagi, ke Desa sabagi.

### SARGGA IX.

Indik Pesamuan / Paruman.

### PAWOS 29.

1. Mungwing pasamuan sane wenten ring Desa Adat Kebung, lwire:
  - a. Pesamuan Desa.
  - b. Pesamuan Prajurun Desa.
  - c. Pesamuan Banjar.
  - c. Pesamuan Sekeha Truna Truni.
2. Salwir lwir pasamuan prasida memargi, yan sampun katedunin antuk krama sane patut nyangkepin, maka becik ipun yan sampun rauh langkung ring atenga akweh ipun sinomanyane tedun ma -

nyangkepin.

3. Sahananing pamutus bebaos, keutsahayang makadi keaptiang pisan mangda melarapan antuk gilik beriyuk sapanggul, yan angde tan nyidayang, paswaran kramane sane makwehan, sinanggah pamutus pasamuan, patut angge sareng sami.
4. Ring tepengan sahananing pasamuan, tan mari keaptiang pisan, mangda kemanggalain/kekawitin antuk pangarcana ring Ida Bhagawan Penyarikan, saha widi widanan sasregepnyane.

### PAWOS 30.

1. Pesamuan Desa patut kawentenang nangken ngesasih sapisan, nuju dina rahayu.
2. Sanunggil pasamuan inucap, Kelihan / Prajuritun Desa, kapatut nyiarang salwir lwir pemargginyane ngenterang Desane, pamuatnyane ngeninin indik-indik :
  - a. Munjuk lungsuring pakraman miwah ayah ayahan.
  - b. Pemarggi-pemarggi, miwah sabacakan panelas mapawangun, kalih ngaturang pahaci, makadi sulur, miwah gunggung artha berana drewen Desa, jawat sane kari, lewih sane sampun telas.
  - c. Pemargi miwah utsahan-utsahan Desa sane mabuat.
  - d. Pioli Desa sane marupa upun-upon tanah, sakadi upun-upon bangket miwah tegal, makadi pioli siosan.
  - e. Midartayang sasakrah wicara, pitungkas-pitungkas, sane durung miwah sampun sida kapuputang antuk Prajuritun Desa.
  - f. Daging pasamuan pasamuan miwah paswara-paswara sane mabuat sane patut kauningin antuk krama Desa samian.
  - g. Pengrencanan Prajuritun Desa, ngeninin jawat usaha utsahan Desa, miwah pemargi-pemargi sane patut pacang margiang kaungkur.
3. Siaran-siaran ringajeng patut katimbangin, tur ka dumpil dumpilang antuk pamilet pasamuan, pamekas mangda sida polih kaputusan pesamuan, guluk sapulung sareng sami.
4. Pamutus pesamuan kadi inucapingajeng, sinanggah gagulak miwah sipat siku-siku, sane patut kasungkemin antuk ikrama Desa sareng sami, tur patut kelaksanayang antuk Prajuritun Desa.

### PAWOS 31.

1. Sawinaning kadi inucap ringajeng, pasamuan Desa patut kawentenang, yan sampun sangkaning kawidi antuk krama Desa langkung ring a Banjar.

2. Sang ngawidi kadi ringajeng, patut ngaturang bantang bebaos sane mabuat, sane sandang tunasang ring pasamuan Desa.
3. Pasamuan Desa rikalaning kadi asapuniki, patut ngicen tatimbangan-tatimbangan, majeng ring sangawidi nunasang bebaos, tur pamuatnyane mangda sida ngicen pamutus, sane manut ring bebakan :
  - a. Daging Awig Awig Desa Adat Kebung.
  - b. Lingning sastra agama Hindu.
  - c. Dresta-dresta miwah pamargi-pamargi sane ketami saking nguni tur tan mèmipas ring Undang-Undang miwah petaruan-peraturan, makadi dasar Negara Republik Indonesia.
  - d. Tur mangda jangkeping pangelokika, pangambaribawa, manut tri pramana : sakadi ; lekita saksi, bukti.

### PAWOS 32.

1. Pasamuan Prajuritun Desa, patut kawentenang, sanistan ipun nge-sasih sepisan.
2. Pasamuan inucap, patut katuntun antuk Bendesan Desa/Kelihan Desa Adat.
3. Sahananing Prajuritun Desa patut nyangkepin pasamuan Desane inucap.
4. Pasamuan Desa inucap, gumananti pacang ngarinciang upaya, sane mangulati kehitawasanan, miwah pasukretan Desa saha sane patut pacang margiang kaungkur, lwir ipun :
  - a. Ngunjuk lungsurang sakalwiring pawangunan-pawangunan sane mula dados among-amongan Desa.
  - b. Pemargi pahaci aci, sregep rauhing tatacaraning pangupakaran ipun, manggala ring Kahyangan Tiga, sane rumaga panguluning Desa, miwah Pura-Pura siosan.
5. Sahananing upaya pangrincining pasamuan inucapingajeng, maka-din ipun pamuat sane pacang niwakin tategenan ikrama Desa, tan wenang kemargiang, yan durung kaputus kapikukuhin antuk pasamuan Desa.

### PAWOS 33.

1. Pasamuan Desane, kasinanggih pangawisesa, sane wenang tur ka-yogia nyelemputihang, pemargi-pemargi ring Desa, manut Awig Awig miwah dresta-dresta.

SARGGA X.  
Indik Kukul.  
PAWOS 34.

1. Kukul Desa miwah Banjar, sane kasungkemin tur kapi kukuhin saking nguni, maka wangsit miwah ciri patedunan Desa kalih Banjar, miwah sekeha penyaak siosan. Sawinaning maka ciri patedunan, taler maka wangsit, yan rikalaning krama Desa mamangguh panca bhaya.
2. Reh asapunika pamuat kukul kadi inucap ringajeng, awanan tan kawenangang nepak kukul, yan tan pamuate manut kadi umungguh ringajeng.
3. Munggwing tabuh tatepakan, kapatut masios siosan manuting taturon, lwire :
  - a. Swaran tabuh kukul, tatenger patedunan ring Desa miwah Banjar, Pura Pemaksan, miwah sekeha penyaak siosan.
  - b. Swaran tabuh kukul, maka tengeran upakara Dewa Yadnya ring Pura-Pura, mangda banban tur langa, rumaga panuur Sanghiang Widdhi.
  - c. Swaran tabuh kukul bulus, makacihna wenten kepanca bhaya lwire :
    - Umah puhun, toya ageng sane pacang nyengkalen.
    - Wenten krama Desa sane kaicalan, makadinyane kerauhan baak, rampok, miwah pandang siosan.
    - Wenten krama Desa marebut, makadi amuk, miwah kabhaya pati siosan.
4. Swaran kukul, maka tatenger manutang patedunan-patedunan sekeha.
5. Sawinaning pamoate sekadi unungguh ringajeng, sakrahing kukul sane wenten ring Desa Adat Kebung, jawat kukul Desa, Banjar, Pura-Pura, tan wenang katepak utawi kaswarayang.
6. Yan wenten salih tunggil krama Desa mamurug kadingajeng, patut kapidandur katiwakin danda olih Prajurun Desa. Buat agunglitning desa, manut ring pamutus pasamuan Desa, miwah Banjar.

PAWOS 35.

1. Sakrahing krama Desa wenang nepak kukul yan sampun pamuate :
  - a. Mamangguh panca bhaya, miwah penyengkalen, sane pawerat pati.
  - b. Sangkaning sapituduh Kelihan Desa, Banjar miwah Kelihan

Pura.

### PAWOS 36.

1. Sasakrahing kukul, jawat Desa, Banjar, Pura-Pura Kahyangan miwah kukul-kukul siosan sane wenten ring jebag wawidangan Desa Adat Kebung, patut nyambung nepak kukul, yan rikala wenten prade kukul Desa, Banjar, Pura-Pura maswara, nyihnayang wenten amuk, bhaya pati, miwah panca bhaya siosan, patut katedunin antuk krama Desa, mangda ring gelis matulung, saha makta gegawan, sane manut pacang angge matulung.
2. Swaran kukul patedunan, patut katedunin antuk krama Desa miwah Banjar, Pemaksan, manut daging dedauhan utawi pasiar Prajuritun Desa miwah Kelihan Banjar kalih Pura pemaksan.
3. Swaran tabuh kukul, tatenger bhaya, patut katedunin antuk krama Desa lanang, ya ke ayah ngarep, panyele, sesabu/truna truni, saha mangda sayaga makta gegawan pamitulung anut rupaning bhaya.

### SARGGA XI.

Laluputan Desa, Banjar miwah Pura Kahyangan Desa.

### PAWOS 37.

1. Desa, Banjar, Pura pemaksan, Kahyangan Desa, wenang mapaweh laluputan, sane marupa ; ayah ayahan, patedunan, kalih urunan, jawat marupa daging, reramon, majeng ring sang kawangiang linggihnyane, miwah ring sang kawelas asih.
2. Buat sor singgih laluputan inucap, miwah bacakan sang patut kaluputang ring Desa, Banjar, Pura Kahyangan Desa, mangda kapi-dartayang ring pasamuan, makadi kedamiakang ring kramane samian samangdene prasida watra pahuninga, ring pamargin laluputane inucap.
3. Sane patut polih laluputan ring Desa lwire :
  - a. Prajuritun Desa.
  - b. Kabhayan Desa.
  - c. Sahananing Ida Sang Sadhaka.
4. Sios ring sang inucap kadingajeng, tan lempas marep ring sang :
  - Nahenin sakit tahunan.
  - Wang cedangga mabuat/banget.

SARGGA XII.  
Indik Karang Pomahan.  
PAWOS 38.

1. Saskrahing karang-karang pomahan kapatut :
  - a. Patut ngangge/wenten wates ipun, sakadi tembok, miwah pepageran, miwah sane siosan.
  - b. Mapamedal kemargine utawi karurunge, mangda tan wenten kabebeng.
  - c. Prajuritun Desa, lewihnyane i Bendesa, patut ngutsahayang pisan mangda sami karang-karange kadi ringajeng kawentenan ipun.

PAWOS 39.

1. Sasakrah krama Desa kapatut mangda ngewatesin karang nyane soang-soang jantos sida treptinya tur Desa.
2. Wates karang sane mejrapitan, patut kategen antuk krama Desa, sane maulon kawates inucap manut dresta.
3. Taru-taru miwah entik-entikan sane mahurip ring watese sekadi ringajeng, prasida kadue antuk kramanne sane negen inucap.

PAWOS 40.

1. Tanem tuwuh, miwah tetanduran siosan, makadi sakalwir wewangunan, miwah tatakramaning ngangge karang, tan wenang niyebin, ngawanang pocol, makadi ngaletihin karang panyandingnyane kiwa tengen.
2. Prade yan angde wenten kadi asapunika, wenang kasepat gantungin, miwah katiwakin danda, kalih pamidana siosan, antuk Bendesa Adat Kebung.
3. Tanem tuwuh, miwah wewangunan sane mebaya ring panyandingnyane, sesampun kasepat gantungin kapatut mangda ngingsirang wewangunan inucap, saha mangda mademang tanem tuwuhnyane, mawates adepa agung ngajroang saking watese inucap.

PAWOS 41.

1. Sasakrah krama Desa, tan kawenang ; nanem, nunjelsawa, awak-awakan sawa ring karang pomahan.
2. Sawinaning kadi inucapingajeng, taler tan wenang, makta, makadi ngenahang salwir barang-barang sane ngaletihin ring karang pomahan, bilih-bilih kaletahan inucap, uning ngalimbak tur ngelantur ngaletihin Desa manut sastra agama Hindu.

SARGGA XIII.  
Indik Kahyangan.  
PAWOS 42.

1. Bacakan Kahyangan sane wenten ring jebag wawidangan Desa Adat Kebung, wenten kalih soroh, lwir ipun :
  - I. Kahyangan Desa, sane rumaga murddha panyiwian Desa Adat Kebung, makadinyane ;
    - a. Pura Puseh Kebung.
    - b. Pura Dalem Kebung.
    - c. Pura Desa Taman Gangsing.
  - II. Pura-Pura Dadia wiadin Paibon-paibon, sane rumaga kamimitan, sane kasiwi antuk iketan pakula wargan soang-soang, lwire :
    - a. Pura penataran Pasek Gelgel, apelebahan.
    - b. Pura Dadya/Paibon Pasek Gelgel, apalebahan.
    - c. Pura Dadya/Paibon Pasek Tutuwan, apelebahan.
    - d. Pura Dadya/Paibon Pasek Salain, apelebahan.
    - e. Pura Dadya/Paibon Pulasari, apelebahan.

PAWOS 43.

1. Prajurit Desane, kapatut nuntun, ngenterang krama Desane nge - manggehang tur ngematmiang kasucian Kahyangan Desane.
2. Sakalwir bacakan cendalane, tan dados ngeranjing ring Kahyangan Desa, miwah ring Pura-Pura sane siosan, sane wenten ring sawewidangan Desa Adat Kebung, lwire :
  - a. Janma luh sebel kandel sakalwir ipun, sekadi ; angraja swala, madue pianak, miwah kruron, mangda manuting sengker, lwire
    - Yan mangraja swala, mawates pitung rahina, nanging yan sampun masisig mambuh, tur sampun malukat, miwah matirtha kantos ping tiga.
    - Yan anak madue pianak utawi karuron, mawaneng asasih pitung rahina, tur sampun malukat miwah matirtha ping tiga.
  - b. Janma cuntaka sangkaning kepademan.
  - c. Sahananing janma patita, lwire ; panak bebinjat, anak beling kesangamain, tan kapahayu sinangaskara, anak sakit ila, janma buduh, miwah candala siosan sane durung kalukat, makadi kaprayascita manut lingning sastra agama Hindu.
  - d. Janma sane kepastiyang panten antuk Prajurit Desa.
  - e. Sate agung, makadi ; banteng, kebo, kuda, bawi, sawinaning



rikala mapepadan.

- f. Sahananing barang-barang sane kasinenggeh letuh, manut lingning sastra agama inucap, lwire : sane mawiwit wangke, layuban sawa (sahananing layuban Pitra Yadnya).
3. Ring sajroning suter Kahyangan-Kahyangan Desa, miwah Pura-pura siosan, tan wenang ngaletuhin, upami, sakadi :
- a. Memisuh kalih wakparusya siosan.
  - b. Uyut, metungkas, miyegan, bilih-bilih kantos kanin medal rah.
  - c. Makebetan, manyuh, makadinyane masanggama, miwah sahananing pemargi sane kanggeh ngaletehin siosan, manut kojara-ning agama.

#### PAWOS 44.

1. Sinalih tunggal ikrama Desa, memanggih utawi uning, mungging wenten janma ngaletuhin Kahyangan Desa, makadi Pura-Pura siosan, sakadi sane inucapingajeng, patut nyupeksayang, ring Prajuritun Desa, maka lewihnyane ring Bendesa.
2. Prade krama Desa inucap tan nyupeksayang ring Prajuritun Desa inucapingajeng, wenang kapidana, katiwakin danda, reh kasinenggeh saroro ring anak corah.  
Buat agungliting desa, pateh-pateh ring sang melaksana corah.

#### PAWOS. 45.

1. Prajuritun Desa, patut nyungkemin, nulingayang para Pemangkune sane kanggeh jan banggul, mungging tedun ring palinggih-palinggih Kahyangan Desane, miwah ngiyasin, makadi ngawangsu pralinggan Sanghiyang Widdhi.
2. Sawinaning Pemangku inucap, sang sapa sira ugi, tan dados mungging tedun, ring palinggih-palinggih purane, lewih ngambil pralinggan Widdhine ring Kahyangan Desa.
3. Sahananing ilen-ilen, sane tan mari nyanggraha pamarggin upacara aci-acine ring Kahyangan Desa tur sane kanggeh tumabul Desa, tan mari kematmiang antuk Prajuritun Desa miwah krama Desa samian sakadi :
  - Baris "Dadap".
  - Rejang, miwah daratan rikalaning mabuang.

#### PAWOS. 46.

Pa aci aci ring Kahyangan Desa.

## PALET I.

1. Prajurit Desa patut ngemanggehang, tur netepang pamargin aci-aci ne ring Kahyangan Desane, manut agung alitning aci-acine sane patut kemargiang lwire :

## PALET I.

### Piodalan

1. Ring Pura Puseh Kebung, patut kemargiang nangken satahun sepisan rikala nemonin sasih Purnamaning sasih Kapat.
2. Ring Pura Dalem Kebung, patut kemargiang nangken rahina "Budha Wage wara Kulawu" (ngenem sasih sepisan).
3. Ring Pura Desa Taman gangsing, patut kemargiang nangken rahina "Anggara Keliwon wara Prangbakat (ngenem sasih sapisan).

## PALET II.

### Pa aci - aci siosan.

1. Sawinaning aci-aci piodalan, wenten taler pa aci-aci siosan, lwire :
  - a. Aci pemapag, kemargiang riklaning sasih kelima, mangda nemonin "Kajeng Keliwon" aci inucap, kawentenang, magenah ring Pura Taman Gangsing.
  - b. Aci-aci nyatsat miwah neduh, sane matetujon manangluk mra-na, patut kemargiang, rikala pantune sampun matuwuh asasih.
  - c. Aci pengayu ayuan, patut kemargiang rikala pantune sampun meluspusin. Aci inucap ringajeng, kawentenang megenah ring Pura Desa Kebung, tur ke among antuk Desa Adat.

## PALET III.

### Aci - aci Pecaruan.

1. Krama Desa Adat Kebung, kapatut ngemargiang pecaruan Kesangan nangkene sasih "Kesanga" lwire :
  - a. Tawur agung (metabuh gentuh).
  - b. Ngemargiang panyepian, lwire ; nyepi geni, nyepi swara, nyepi karya, nyepi alelungayan.
  - c. Manca sanak, miwah manca satha, malik sumpah, miwah maneca kelud.
2. Sawinaning pecaruan kadi inucapingajeng, krama Desa samian, kapatut ngayab ketipa kesanga.
3. Sios ring pacaruan Kesanga, wenten taler aci-aci pecaruan sane pa -

tut kemargiang ring Desa Adat Kebung, lwire :

- a. Aci-aci pemayuh Jagat, Desa patut ngemargiang rikalane Jagate kabrebehan, kadiangganing gering, grubug. Munggwing mangda nemonin "Kajeng Kliwon" kawentenang magenah ring Pura Desa Kebung.
- b. Aci-aci masegeh patut kemargiang nemonin rahinan "Kajeng Kliwon" nuju sasih kenem magenah ring pempatan Agung (Catus patha).
- c. Aci-aci pecaruan/mecaru, patut kemargiang rikala nemonin rahinan nuju Kajeng Kliwon sasih Kepitu, kawentenang magenah ring panguluning Kstra.
- d. Aci-aci Ngusaba Sri, patut kemargiang, sausan ngampung, maka uger-uger Subak Umabalan. Aci inucap kawentenang magenah ring Pura Puseh Kebung.
- e. Aci-aci pangembak, patut kawentenang, rikala nemonin rahinan "Kajeng Kliwon" nuju sasih kasa, kawentenang magenah ring Pura Desa Kebung.
- f. Aci-aci masegeh ring Banjar, miwah ring pekarangan pomahan krama Desa soang-soang, patut kemargiang rikala nemonin rahinan "Kajeng Kliwon" sasih Karo.
- g. Yan sampun aci-aci inucapingajeng kemargiang, wawu raris ikrama Desa sinalih tunggal dados masèdok, nyadokang ring Prajuritun Desane, miwah ring krama Desa, indike pacang mataki ngawangun karyya Pitra Yadnya, atiwa tiwa (Ngaben).

#### PALET IV.

Sawinaning aci-aci sane kemargiang antuk krama Desa, wenten taler aci-aci sane kemargiang antuk kula warga Padadyan-Padadyan, lwire

- a. Piodalan ring Pura Penataran Pasek Gelgel, kemargiang rikala Purnamaning sasih Kedasa.
- b. Piodalan ring Pura Pasek Gelgel, kemargiang rikala Purnamaning sasih Kawolu (ngetahun sapisan).
- c. Piodalan ring Pura Pasek Tutuan, kemargiang rikala rahinan "Buddha Wage wara Langkir (Ngenem sasih sapisan).
- d. Piodalan ring Pura Pasek Salain, kemargiang rikala rahinan "Buddha Kliwon wara Sinta" (Ngenem sasih sapisan).
- e. Piodalan ring Pura Pulasari, kemargiang rikala rahinan "Buddha Umanis wara Dukut" (Ngenem sasih sapisan).

#### PAWOS 47.

1. Aci-aci inucapingajeng, miwah Panca yadnyane siosan, sane kemargiang ring Desa Adat Kebung kapatut mangda kapuput ugi antuk Ida Sang Sadhaka, sane kanggeh Pathirthayana Desa Adate ring Kebung.
2. Para Pemangku sane kanggeh Kabhayan Desa, wenang nganteb aci-aci pecaruan, nanging yan sampun kalugraha antuk Ida Sang Sadhaka inucapingajeng.

#### PAWOS 48.

1. Salwilwir peaci-aci ring Desa Adat Kebung, jawat ring Kahyangan Desa, rauhing pacaruan, kadi inucapingajeng, patut ;
  - a. Kematmiang.
  - b. Kasungkemin.
  - c. Kapikukuhin antuk Prajuritun Desa, miwah krama Desa sareng sami.
2. Tan mari kaenterang, katuntun, antuk Prajuritun Desa miwah Kabhayan Desane.
3. Sabacakan panelas aci-acine inucap, patut kabongkolin antuk ;
  - a. Upon-upon tanah, jawat bangket, miwah pategalan, laba Pura utawi druwen Desa.
  - b. Urunan-urunan, wedal-wedalan marupa raja berana, artha, miwah reramon, saking krama Desa, manut nistha madyottama-ning karyya sane karembat.
4. Sinalih tunggil yan angde wenten alangan Desa, sakadi ;
  - a. Kacuntakan, kabrebehan sane ngawanang kasebelan krama Desane.
  - b. Karugan palinggih-palinggih, tembok-tembok, miwah pepayon siosan ring Pura, ingan durung puput kekaryyanin, sane bilih-bilih ngawanang pacang randat, pengambilan pakinkin upakara acine, awanan wenang aci-aci inucap kerangkadang, mawaneng masue malih apurnama, tan wenang langkungan.  
Yan angde tan nyidayang malih apurnama, wenang malih setahun mangaci, utawi yan tan asapunika, patut ngerahinin kewanen.

#### SARGGA XIV.

Tata treptining patedunan  
PAWOS 49.

## PALET I.

Indik tedun mesangkepan.

1. Salwirlwir patedunan, patut kaenterang, tur katuntun, antuk Kelihan, jawat Desa, Banjar miwah Pura.
2. Sasakrahing krama Desa miwah Banjar, makadi pemaksan Pura-pura, kapatut mangda watra tedun nyangkepin pararemane, manut ring atagan, kerab, miwah swaran kulkul patedunan.
3. Yan wenten sinalih tunggal, krama Desa kapialang, ingan tan nyidayang manedunin sangkepan, lwire alngan :
  - a. Kageringan.
  - b. Matepetin kula warggane kageringan rahat.
  - c. Kalung yan kadohan, miwah ngemarginin karyyan Pemerintah, kapatut mangda nyupeksayang ring salih tunggal Prajuritun Desa utawi Banjar miwah Pura.
4. Salwiring patedunan/pesangkepan kapatut mangda ngangge, tur netepin tata treptining patedunan pasamuan Desa, miwah Banjar makadi Pura, lwire :
  - a. Keaptiang pisan sasakrahing krama Desa, Banjar miwah Pura-Pura, mangda ngangge kampuh/saput, manut tata susilaning mapengangge.
  - b. Malinggih napak tur masila melpel, mangda manuting tata susilaning linggih, saha tan dados ngungkurin Prajuritun Desa miwah Kelihan Banjar miwah Pura.
  - c. Sayaga nyantos pasiar Kelihan, makadi Prajuritun Desa.
  - d. Mangda dendem, tan dados umung, upami ; mecanda, lewih mabaos ngacuh, salwir babos sane ngardhi sula karana, kadiangganing ; nemah, mabaos kotor/cabul, saling cacad sareng timpal, lewih manguman-manguman, miwah sahananing bebaos sane kawon, jawat marep ring krama Desa, punapi malih marep ring Prajuritun Desa miwah Kelihan.
  - e. Sanunggil krama Desa, Banjar, miwah Pura-pura, wenang nunasang pamidharta-pamidharta ring Prajuritun Desa, Kelihan Banjar miwah Pura, sane mabuat, samangdene madue pauning galang apadang upami kadiangganing usang ;
    - Gunggungan panelas mapawangun, ring Desa, Banjar makadi Pura-pura.
    - Gunggungan panelas pa aci-aci ring Desa, Banjar miwah Pura.
    - Panelas-panelas siosan sane gumanti mangge mahayu Desa miwah Banjar, Pura-pura.

5. Yan wenten sinalih tunggal krama Desa, miwah Banjar, Pura-pura, tan manut makadinyane mepas ring kadi inucapingajeng, wenang kapidana, saha katiwakin danda olih Prajuritun Desa, miwah Banjar Pura-pura, reh sisipe ngemari tata susila.

## PAWOS 50.

### PALET II.

Indik patedunan ngarembat karya.

1. Salwiring karya Desa, agung miwah alit, kadiangganing ;
  - a. Ngerisakin Pura-pura Kahyangan Desa.
  - b. Ngawangun palinggih-palinggih, miwah pepayon siosan sahana-ning karugan ring Pura Desa.
  - c. Ngererata marggi, rurung-rurung, miwah Ksetra, patut karembat antuk krama Desa bulangkep. Yan ageng tur berat karya Desane, wenang nyarad krama Desa panyele, miwah sesabu/Sekeha Truna Truni.
2. Yan rikalaning makaryya ngrerata margi, rurung-rurung, wenang karya inucap kapalih antuk Prajuritun Desane, manut agung alit-ning karya, tur yogia ngemargiang krama Banjar, miwah Tempek, mangda ngempon karyaane soang-soang, sane katiwak antuk Bendesa miwah Prajuritun Desa siosan, anut ring akweh kedik krama Banjar miwah Tempek, sane patut pacang nyanggraha ngerembat karyaane, tatiwak Prajuritun Desa inucap.
3. Salih tunggal yan wenten Banjar miwah Tempek, tan/durung mutang karya emponyane, yogia naregteg karyaane ngantos put, manut sengker sane kapituduhang antuk Prajuritun Desa.
4. Lwir karya Desane sane patut kemargiang, tur katetepang antuk Bendesa/Prajuritun Desa lwire ;
  - a. Ngerisakin Pura-pura Kahyangan Desa, patut kemargiang nangen sangkepan (Ngesasih) samangdene Pura-pura Kahyangan Desa inucap, manggeh kasucian, miwah kabresihannyane, langa ngayunyanin.
  - b. Ngererata miwah ngerisakin marggi, patut kemargiang, mangken kalih sangkepan (Ngalih sasih sapisan) samangdene, marggi miwah rurung-rurung inucap, manggeh kabecikannyane saha satata galang miwah asri.

- c. Ngererata miwah ngerisakin Kstra, patut kemargiang, manut panglokika Prajuritun Desa samangdene Kstra inucap, tetep galang, bresih tur asri.
  - d. Ngerisakin Banjar, patut kemargiang, nangken sangkepan Banjar (Ngesasih)
5. Yan wenten salah tunggil krama Desa tan rauh tedun makaryya, wenang katiwakain denda, maka pamelin gawe. Buat agung alit ning dendan inucap, nganutin dresta-dresta sane sampun memarga. Yan wenten pesadoke ring Prajuritun Desa makadi Bendesa, miwah Kelihan Banjar, Pura, manut pamoate, kadi inucapingajeng, wenang kalugraha.

### PALET III.

Tata treptining wewalungan miwah bebek.

#### PAWOS 51.

1. Sakrahing krama Desa, sane madrewe tur ngubuh wewalungan, kapstutang mangda sayaga, nureksain, negul, malengbeng, ngelogorin ubuhnyane, samangden tan ngaruçakin, pekarangan pomahan pisaga, pabiyanan pisaga, lalemah Pura-pura, bilih-bilih, ngantos ngeranjingin Pura-pura sane dahat ngaletihin.
2. Reh asapunika awanan sakrahing krama Desa, kapatut :
  - a. Sane ngubuh bawi, bangkung, kucit, kapatut mangda malengbeng/negul, miwah ngalogorin.
  - b. Yan banteng, kapatut mangda, manegulang ring bangket, miwah pategalan pekaryyanyane soang-soang.
3. Prade wenten salih tunggil krama Desa mamurug, wenang kapisip tur katiwakin danda, sekadi ;  
 Yan tan malengbeng, bawi, bangkung, miwah kucit wenang danda keh ipun = Rp. 1.000,-  
 Yan godel matuwuh sadurung nem sasih, patut galogorin/mategul baong, yan mamurug wenang danda keh ipun = Rp. 500,-  
 Yan sampun matuwuh nem sasih, wenang matelusuk, yan mamurug wenang danda = Rp. 100,-
4. Yan angde wenten wewalungan inucaping ajeng ngeleb ngantos ngarusak tetaneman, patut danda kadi inucapingajeng tur naur karugian, manut argga sane karuçakin, mantuk ring sane madrewe tandurane.
5. Prade wenten salih tunggil wewalungan ngeleb ngeranjingin Pura-

- pura Kahyangan Desa utawi Pura-pura Pedadyan anak siosan, wenang katiwakin danda tur saha ngawijilang panelas pangupa kar pemrayascitta Pura inucap, duaning lenga ngawanang letehing Pura-pura inucap.
- 6. Yan wenten wewalungan ngeleb tur ngeranjingin pekarangan pomahan anak sios, kandugi ngusak tetanduran, wenang katiwakin danda kadi inucapingajeng tur maweweh naur karugian manut arga, karugian inucap mantuk ring sang madrewe tetandurane.

PAWOS 52.

1. Sasakrahing krama Desa sane madue wewalungan, banteng, kebo, jaran miwah kambing, tan kepatut pacang manegulang/matokang, miwah ngangon, ring genahe kadi ring sor puniki ;
  - a. Ring palemahan sutereng Pura-pura, jawat Pura Desa miwah Pedadyan, sane wenten sajabag Desa Adat Kebung.
  - b. Marggi-marggi ageng, miwah rurung, telajakan karang pomahan pategalan, bangket anak sios, Kstra, bejin Desa, miwah Banjar.
2. Yan wenten sinalih tunggil krama Desa mamurug kadingajeng, wenang katiwakan danda keh ipun = Rp. 25.000,- ( Siu ringgit ).
3. Sang sapa sira ugi krama Desa mamanguh, keaptiang mangda gelis nyupeksayang ring Prajurun Desa, Kelihan Banjar, Pura miwah Tempek.
4. Yan tan ikrama Desa sane mamanguh, gelis nyupeksayang ring Prajurun Desane, mawastu kauningin antuk anak sios, wenang krama Desa inucap, katiwakin danda, pateh-pateh ring sang madrewe wewalungane. Danda inucap, mantuk ke Desa satengah, ring sang nyupeksayang satengah.
4. Yan wenten krama Desa mamurug, ngenahang wewalungan ngantos ping tiga, awanan kepatut ;
  - a. Dedandanyane katikelang ping kalih.
  - b. Tur ke atur ring sang rumaga rinawos ( Pemerintah ) duaning kasinenggeh nyeleka utawi ngerug pasukretan Desa Adat Kebung.

PAWOS 53.

1. Sasakrahing krama Desa, sane ngubuh bebek miwah kakirik, tan kepatut ;
  - a. Ngangon, tur ngalubar ring bangket, yan pantune kari alit,



- sadurung manuludin.
- b. Ngangon, miwah ngalambar rikala pantune sampun kuning.
2. Prade wenten salih tunggil krama Desa sane mamurug kadingajeng, wenang bebek miwah kakirik inucap, ketaban, antuk sang madrewe tetandurane, nanging mangda ngangge sulur, nyupeksayang ring salah siki Prajuritun Desane, utawi ring Kelihan Banjar miwah Tempek.

PALET IV.  
Indik Wewangunan.  
PAWOS 54.

1. Salwirlwir wewangunan, kapatut ;
  - a. Wewangunan ring karang pomahan, tan kawasa ngungkulin Pura-pura miwah Banjar.
  - b. Tan kawasa capcapan pewangune ngungkulin/ngelitangin wates karang siosan.
  - c. Salwiring wewangunan krama Desane, 'sane magenah soran, kawasa ngungkulin kaulon.
2. Prade wenten wewangunan ring tengahing wates, patut ngwentenang paigun, tur nyupeksayang saha nunas pamutus ring Bendesa utawi Prajuritun Desa, prade wenten mamurug, kadi inucapingajeng wenang wewangunan inucap, yan kawekas, wenang kawara antuk Bendesa miwah Prajuritun Desa tur wewangunan kadingajeng wewangunan kagubar, saha tan polih prabeya.

SARGGA XV.  
Indik Panca Yadnya.  
PAWOS 55.  
PALET I.

1. Salwiring "Panca Yadnya" sane kemargiang ring Desa Adat Kebung, kapatut mangda kapuput ugi antuk Ida Sang Sadhaka, sang kanggeh patirthayan Desane ring Desa Adat Kebung.
  2. Buat pemarggin "Panca Yadnya inucap, patut kemanggehang, kemomotang, kewangiang tur kelaksayang antuk sasakrah krama Desane ring Desa Adat Kebung, jawat nistha, madya, lewih maut-tama, upacaraing yadnya inucap, lwire ;  
I Dewa Yadnya.
- 1. Sanunggil dina rahayu ( Puranama, Tilem ) kapatut ngaturang,

- canang sari, sesanganan, sesayut ring Pura-pura Kahyangan Desa, Paibon, miwah ring Sanggah Kemulan soang-soang.
- 2. Sanunggil Sasih, miwah, miwah rahina piodalan, Krama Desa miwah krama pemaksan patut ngaturang aci piodalan, sregeping upacara, jawat nistha, madyottama pengambile, mangda nganutin kacecap sastra agama Hindu, kalih dresta-dresta sane katami saking nguni.
- 3. Sanunggil rahina "Saniscara Umanis Watugunung" krama Desa Adat Kebung, patut ngaturang piodalan Sanghiang Aji Saraswati ( Ngodalin Presasti, Piagem-piagem, miwah lontar-lontar siosan ). Tur benjangnyane ring rahina "Redite Paing Sinta" sasakrahing krama Desa, lanang wadon alit kelih, patut mebanyu pinaruh, nunas kerahayon, makadi gagasan ring Ida Sanghiang Aji Sara Swati.
- 4. Sanunggil ngenem sasih ( Nangken rahina Buddha Kliwon Dungulan miwah Saniscara Kliwon Kuningan ) kapatut sasakrahing krama Desa ngaturang bebanten ring Pura-pura ;
  - Kahyangan Desa ( Pura Puseh, Dalem, Pura Desa Taman Gangsing )
  - Pura-pura Dadya/Paibon soang-soang.
  - Sanggah Kemulan soang-soang.
 Sausan maturan ring Pura-pura, ngraris krama Desa samian, kapatut ngayab sesayut Galungan maka toas sang Butha Tiga ( Sang Butha Dungulan ) mangda nenten ngrubeda sarira, soang-soang.

## II. Manusa Yadnya.

1. Upakara manusa yadnya patut kemargiang antuk sahananing krama Desa Adat Kebung, ngawit saking;
  - a. Ngupakara bobotan.
  - b. Ngupakara rare wawu lekad.
  - c. Ngelepas awon ( rare matuwuh tigang rahina).
  - d. Tutug kekambuha.
  - e. Tigang sasih.
  - f. Awoton ( matuwuh nem sasih ).
  - g. Ngawit maketus.
  - h. Menek kelih ( anak luh ngawit sebel didewek ).
  - i. Magetep bok.
  - j. Matusuk koping.

- k. Metatah.
  - l. Pawidi widanaan ( merangkat ).
  - m. Mawinten.
2. Sahananing krama Desa sane "Deha miwah Truna", Deha matuwuh 18 tahun, Truna matuwuh 20 tahun, yan pacang memargi merangkat, keaptiang mangda memargi nganutin pemarggi; "De-wa wiwaha miwah Gandarwwa wiwaha"
  3. Sahananing krama Desa, tan kayogiyang rikala merangkat nge-margiang pemarggin ;  
 "Daetya wiwaha, Raksasa wiwaha, miwah Pisaca wiwaha.  
 Yan wenten sinalih tunggil krama Desa, pamekas ring tepengan  
 "Deha Truna" wenang kabelasang antuk Prajuritun Desa.
  4. Sasakrahing krama Desa, tan kapatutang ngelaksanayang rangkat, sane kebaos "Ganya Gamana".  
 Yan wenten salih tunggil mamurug, pemarggi kadingajeng, wenang kabelasang pengantene inucap, antuk Bendesa, miwah Prajuritun Desane ring Desa Adat Kebung.

### III. Bhuta Yadnya.

1. Sakrahing krama Desa ring Desa Adat Kebung, kapatut ngmargi-giang upacara "Bhuta Yadnya" jawat agung miwah alit, lwire ;
  - a. Sanunggil rahina, sausan meratengan, patut ngelaksanayang "Yadnya Sesa" utawi banten pangejot, ring punapi, jeding, pulu, sampat, payuk, lesung, batu pangulingan lesung rauhing lunyane, pangorengan, jelanan miwah tepas dengan.
  - b. Ngaturang pasegeh ring natar Kemulan, natar pomahan, ring pamedal, makadinyane ring natar Pura-pura Paibon, pamoat ring natar-natar Pura Kahyangan Desa, nangken Puranama Tilem, miwah Kajeng Kliwon.
  - c. Mecaru eka satha, manca satha, manca sanak, manca klud, malik sumpah, miwah tawur Kesanga kalih caru-caru siosan, manut lingning sastra agama Hindu.
  - d. Tumpek Uye ( Tumpek Kandang ) wenang ngupa kara wewalungan.
  - e. Tumpek Ngatag ( Tumpek Wariga ) wenang ngupa kara entik-entikan ( Kekayonan ).
  - f. Miwah caru-caru sebacakan caru Dhurmanggala.
2. Sawinaning pecaru-pecaru inucapingajeng, sasakrah krama Desa

- Adat Kebung, kapatut ngemargiang pabiya kalan, pinaka pacaruning raga sarira.

#### IV. Pitra Yadnya.

1. Upacara Pitra Yadnya, sane rumaga jalaran mepenawuran ring sang meraga kawitan, kapatut kemarggiang antuk sasakrahing krama Desa Adat Kebung.
2. Sinalih tunggil yan wenten krama Desa ke antakan ( kepademan ) keaptiang mangda keupakarain manut kojaran sastra agama Hindu, lwire ;
  - a. Mapendem ( matanem ) utawi mebakar, sane ketah kasebut mapendem ring geni, manuting dewasa sane kayogiayang antuk agama.
  - b. Sesampun matuwuh tigang rahina saking mapendeme ( penaneme ) kapatut ngawentenang upakara makta "Sesagi" ke Ksetra, saha patut kapuput antuk Ida Sang Sadhaka, yan alit wenang ngangge tirthan Ida Pedanda kewanten.
  - c. Yan wenten anak alit sane maketus, sane keantakan, wenang upakarain kadi mungguh ringajeng, nanging maweweh tirtha pangentas.
  - d. Pemarggi "Atiwa-atiwa lwire :
    - 1. Sawa Prateka.
    - 2. Sawa Kresihan.
    - 3. Ngrecedana.
    - 4. Swastha.
    - 5. Sawa Pranawa.
  - e. Ngunggahang kedaun bingin ( Ngeroras ) lwire ;
    - 1. Ngeroras di Bale.
    - 2. Ngrempana.
    - 3. Ngemadya.
    - 4. Makadinyane "Mamukur".

#### V. Rsi Yadnya.

Sanunggil krama Desa, wenang ngelaksanayang "Rsi Yadnya" lwire :

- a. Nuwur Ida Sang Sadhaka, ngaturin matirtha yatra, rikalaning nemonin panas panjang.
- b. Ngaturang rayunan sategep ipun, mangda medasar sangkaning bhuddhi nirmala, makadi mangda hati-hati elas.

- c. Ngaturang dana punia, nangken dina rahayu, majeng ring Ida Sang Sadhaka, miwah ring para Pemangku-pemangku, lewih Kabhayan Desa miwah Pemangku-pemangku Pura-pura Dadya.

## SARGGA XVI.

Pasukretaning Tata Pawongan

PAWOS 56.

PALET I.

Tata Susilaning Pawiwahan.

1. Sasakrahing krama Desa, pamekas para "Deha Truna" keaptiang pisan, pemarggi rangkate mangda nganutin pemarggi ;
  - Gandharwwa Wiwaha.
  - Asura miwah Praja pati wiwaha, pamarginyane manut kadi ring sor punika :
    - a. Mepadik, utawi pahadungan sami tuwa, tur mangda medasar sangkaning suka sami suka, ring tepengan "Deha Truna" manut kakecap Manawa Dharma Sasatra, kasebut pemarggi "Asura Wiwaha". *Sana nureksayang raga ring jrejurul Seda*
    - b. Merangkat, utawi ngerorod, sane melarapan suka sami suka ring tepengan "Deha Truna" pemarggin rangkate keaptiang mangda mawaneng saking ngenjit swar, ( Wengi ) saha ngawen tenang pejati, tan dados maheletan rahina, tur ipajati, mangda bobok, saha tan mari mangda wenten saksi. Sesampune maheletan kalih rahina saking pemarggin rangkate, kapatut mangda ngawentenang pangendek saking sang mengambil marep ring sang madue Dahane/Waris sane marep. Ring tigang rahinan nyane, patut ngemarggiang pamalaku ( Pengaksama ) nunas mangda sida ke ampura, antuk sang madrewe dahane, riantuk kaiwangan pemargginyane sesampune ngemarggiang pemelakuneinucapingajeng, jawat keampura miwah tan keampura, tur ngantene, patut mabiyakala, ngicalang sebel kandeling penganten, raris wawu dados medal saking pengkeban. Buat pemarggin pelaku inucap, yan angde tan puput sapisan, patut katregtegang ngantos ping tiga, angde tan sida puput ( tan kapuputang antuk sang madrewe dahane prasida pemarggin ngantene, kasinenggeh puput, tur kawenang ngelanturang pailah ngardinin "Pawiddhi Widhanayyan" manut nistha mad-yottamaning upacara, saha mangda kesaksenan antuk Praju-

run Desa, miwah Kelihan Dinas, Tur tan kapatutang memarggi mantuk nganten kaumah dahane, Pawiddhi widana kadi inucapingajeng, patut kapuputang antuk Ida Sang Saddhaka, yan alit/nistha pengambile, wenang nganggen tirthan Ida Pedanda ugi. Yan tan asapunika upakara pawiddhi widanane, pemarggin ngantene durung mewasta sah, tur wenang kapidana antuk Prajuritun Desa, tur saha mesaksi Kelihan Banjar, Dinas miwah Perbekel. Pemarggin nganten kadi inucap, manut lingning Manawa Dharma Sastra, kabaos pemarggi "Gandar-wwa Wiwaha".

2. Sinalih tunggil krama Desa ngambil ke dura Desa, kepatut mangda nyupeksayang raga ring Kelihan Banjar, Prajuritun Desa, miwah Kelihan Dinas. Yan tan manut pemarggin rangkate, wenang kabelasang tur kapidana, antuk Prajuritun Desa.
3. Salih tunggil yan wenten krama Desa, ngambil anak luh sios agama kapatut mangda keprayascita, tur mangda ngranjing agama Hindu, tur ngeraris "Mawiddhi Widana".

## PALET II.

Sulur pemarggin Rangkat sane melarang  
PAWOS 57.

1. Mungging pemarggin rangkat sane melarang, lwire ;
  - a. Pemarggi Daetya Wiwaha, miwah Pisaca Wiwaha lwire ; Melegandang, mrekosā, miwah memaksa anak luh sane tan demen.
  - b. Pemarggi rangkat sane "Gamyā Gamana" lwire ; Ngambil nyamṣodet, nyama sios meme, sios bapa, tumin lanang wadon dya nyama, keponakan lanang wadon dya nyamaṅ kowalon saking luh mwani, makadi para dara ( nemenin tur nyuang so-mah timpal ).
  - c. Miwah sehananing pemarggi "Smara dudu".
2. Yan wenten salih tunggil krama Desa mamurug pemarggi inucaping ajeng, wenang kapidana tur katiwakan danda, lwire : Rangkat inucap kabelasang, saha katiwakan danda olih Bendesa, reh pemarggi inucap ngranjing ngeletehin Desa.
3. Mungging pemarggi gamya gamana, lwire ; sane ngambil ipah jawat kelihan miwah cenikan, warang saking lanang, wadon, punika ngranjing bacakan gamya gamana, amung amanasi sarira kewala.  
Yan wenten salih tunggil krama Desa mamurug pemarggi kadi-



- 1. Yan angde krama Desa salih tunggil wenten nyapihan, kandugi riwekasmalih matemu makuren sang asapunika kapatut ;
  - a. Mangda ngawit sakadi pemarggin rangkat, patut "Mawiddhi Widana".
  - b. Keni pamidana antuk Desa, yadyastun belase melarapan sangkaning becik, reh pemarggi inucap, kebaos, "Analikin Utah"

#### PAWOS 62.

1. Yan wenten sinalih tunggil pakula warga sane camput, miwah balu, lwire ;
  - a. Yan luh/wadon kapatut, wenang ngawisesa sabacakan sane mawastha waris, nanging tan dados ngadol, ngadeyang, makedihang saraja brana, lewih marupa tanah-tanah bangket, pategalan, yan durung supekta, tur kapatutang antuk sang patut ngewaris.
    - b. Dados ngadol, ngadeyang, yan pacang mangge ;
      - 1. Mahayu Pura-pura, Sanggah ngamimitan, lewih ngawangun yadnya, sahananing "Panca Yadnya".
      - 2. Mrateka sawaning kakung, tur mrateka/ngupakarain sang pacang patut ngewaris, nanging tan dados manelasang.
  2. Yan balu muani, lwire :
    - a. Tan dados ngadol, ngadeang, miwah makedihang saraja, saraja brana, lewih marupa tanah-tanah bangket, pategalan, yan durung supekta makadi kapatutang antuk sang pacang ngewaris.
    - b. Dados ngadol ngadeyang, yan sampun ;
      - 1. Yan sampun sareh saking sang patut ngewaris.
      - 2. Angge mahayu pura-pura kamimitan/Kawitan.
      - 3. Ngawangun karya sahananing Panca Yadnya.

#### PALET IV.

Indik Sentana.

#### PAWOS 63.

1. Bacakan sentana wenten kalih paos, lwire ;
  - a. Sentana sane wetu saking patemuning makuren, kawastanin sentana temen.
  - b. Sentana sangkaning paperasan (Nama putra).
2. Sinalih tunggil yan wenten krama Desa sane camput, tan masentana, nanging yan sampun sareh wiadin keanutin antuk sang patut ngewaris, kula warga Dadya, Kelihan Banjar miwah Bendesa, ke-



- lian Dinas, Perbekel, wenang mameras sentana, buat pemargginyane patut ;
  - a. Mawit saking garis kapurusa.
  - b. Saking paiketan nyama Dadya.
- 3. Sentanane sane kaperas inucap, kapatut mangda kaupacarain manut lingning sastra agama Hindu, tur saha kapuput antuk Ida Sang Sadhaka. Yan durung kapastika kaupacarain sakadingajeng, sentana inucap, durung prasida kebaos sah awanan tan kayogia angliliri ( Ngewaris ).

#### PAWOS 64.

1. Yan wenten sinalih tunggil krama Desa campur, tur tan madrewe liketan waris saking kapurusa, wenang kawaris antuk Dadya.
2. Yan tan wenten madue paiketan kula warga Dadya, kapatut Desa sane ngawasa wasitayang sang asapunika, ngewaris saraja drewe nyane, saha mrateka sapuput ipun.

#### PALET V.

#### Wewarisan.

#### PAWOS 65.

Bacakan sane kasinenggeh wewarisan lwire ;

- a. Salwiriwir drewe kaliliran, sekadi ; sabacakan raja brana, pe ayah ayahan, sekala niskala.
- b. Drewe tengah, paktarangan pomahan, pura Dadya, sanggah, miwah salwir sane dados tetamian, pamoat sane marupa raja brana, sauhing utang piutang.

#### PAWOS 66.

1. Sane prasida kebaos pewaris, lwire ;
  - a. Sentana temen luh mwani, manuting pepalihan rembat, asuhun manut dresta sakingnguni.
  - b. Yan sentanawadon, wenang ngewaris sahananing wewarisan, kadi inucapingajeng, nanging tan kayogia sewenang-wenang pacang ngadol, ngadeyang, makedihang sahananing raja brana, lewih marupa tanah-tanah, jawat bangket miwah pategakan, yan tan sareh saking sang patut pacang mangewaris.
2. Wenang ngadol, ngadeyang, yan pacang mangge prabeya, lwire ;
  - a. Prabeya maka panelas merateka ngupakarain sang kewaris, sekadi, ngaben, ngeroras, miwah salantur ipun.

- b. Mahayu Pura Dadya, Sanggah rauhing ngaturang pa aci-aci.
- 3. Sentana paprasan sane sampun sah.
- 4. Keponakan, cucu, kumpi, selantur ipun sane saking kapurusa. Kadi inucap ringajeng prasida kebaos waris, sane mula wenang ngewaris.

#### PAWOS 67.

Swadarmaning sang rumaga pewaris.

Buat swadarmaning sang rumaga waris, kapatut lwire ;

- a. Patut nulinga, tur ngayahin sang pacang kewaris, pamoat ring nulinga pesangu miwah kewarisananyane.
- b. Nabdab, miara kerahayonyane, manuting kemanusaan.
- c. Mrateka antuk upacara pitra yadnya sapuput ipun ri tekaning keantakan.
- d. Mihara, ngewangiang, nyungkemin, Pura-pura, Sanggah, rauhing saupapali pa aci-aci sami sane katinggalang.
- e. Ngelanturang pemarggi-pemarggi, pamoat ring tepengan paiketan pakula warggan, Dadya makadi Desa.
- f. Ngelanturang pemarggi-pemarggin sesana makrama Desa, ring tepengan ala ayu, sajabag Desa Adat Kebung, miwah sane sios-siosan.

#### SARGGA XVII.

Indik Wicara ring Banjar miwah Desa.

#### PAWOS 68.

1. Salwirlwir wicara sane wenten ring Desa Adat Kebung, kadiangganing pitungkas-pitungkas ring Banjar, ring Pura-pura Pemaksan, Dadya, Subak-subak miwah Tempek, kapatut kebaosin antuk Prajuritun Desa.
2. Yan tan sida kapuput antuk Prajuritun Desa, wenang keatur ring Pemerintah, tur mangda ngelintangin sulur, sane sampun kemanggehang, sekadi ; Kelian Dinas, Perbekel, Camat, selantur nyane.

#### PAWOS 69.

1. Prajuritun Desa sane patut maosin, miwah mutusang pitungkas miwah wicarane kadingajeng keaptiang mangda satata magegulak miwah mateteken antuk ;
  - a. Daging Awig Awig Desa Adat Kebung.

- b. Dresta-dresta sane ketama saking nguni, sane tan mampas ring lingning sastra agama Hindu.
- c. Pamoat wantah Undang-Undang, miwah peraturan-peraturan Pemerintah Negara Kesatuan Republik Indonesia, pamekas Pancasila sane maka dasar pamikukuh.

#### PAWOS 70.

1. Buat dasar-dasar pamutus pitungkas miwah wicara, keaptiang mangda satata kalokikain sane melarapan antuk rangkeping "Tri-pramana", sekadi ;
  - Lekita.
  - Saksi.
  - Bukti.
2. Nanging sajroning ngarereh saksi tan dados, utawi tan kapatut ngangge :
  - a. Sentana temen.
  - b. Keponakan dya nyama, jawat saking luh miwah kapurusa.
  - c. Misan mindon saking kapurusa.
  - d. Tumin miwah koalon dya nyama.
  - e. Kula warga, makadinyane kurenan.

#### SARGGA XIII.

Pamidana miwah dedandan.

#### PAWOS 71.

1. Sane mateges pamidana, wantah sahananing krama Desa sane iwang/sisip, tur mamurug larangan-larangan Desa miwah Banjar pamoat larangan Pemerintah.
2. Sane mateges dedandan, wantah sahananing artha brana, sane kayogiyang maka panebas kaiwangan-kaiwangan/kasisipan, sane sane patut katiwakang antuk Prajuritun Desa Adat Kebung.
3. Sahananing pamidana miwah dedandan sane katiwakang, keaptiang mangda satata anut ring lokika miwah pangarimbawa, catur upaya sandi, lwire ;
  - a. Sama : Krama Desa miwah Prajuritun Desa, pateh-pateh sami keni pamidana miwah dedandan yan angde mepemarggi iwang/sisip, utawi yan mamurug daging Awig Awig Desa Adat Kebung, miwah kaputusan-kaputusan, paswara-paswara, sane gumanti

- kemanggehang antuk Desa miwah Banjar.
- b. Dana : Krama Desa miwah Prajurit Desa, pateh-pateh sami madue wewenang ring tepengan raja bran duen Desa, tur patut mangda sareng-sareng nyung kemin duen Desa inucap, utawi pateh-pateh polih bebagian, makadi ngemedalin urunan-urunan, na nging wenten paundagan-paundagan ipun.
- c. Bedha : Buat tatiwak dedandan salwir ipun, wenten pabinayan pabinayan ipun, manut munjuk lungsu miwah sor singgih, manut agung aliting kasisipan, sane kelaksanayang.
- d. Danda : Sahananing krama Desa miwah Prajurit Desa, yan sampun pratiyaksa iwang/mamurug salwiring larangan-larangan Desa kadi inucapingajeng, wenang kapidana tur katiwakin dedandan manut sisipe.

#### PAWOS 72.

1. Bacakan dedandan sane patut katiwakang ring Desa Adat Kebung, lwire ;
  - a. Marupa raja brana, lewihnyane marupa "Artha".
  - b. Panebas kasisipan antuk paayah ayahan, manut tatiwaking Prajurit Desa.
  - c. Keni prabeya antuk bebanten, maka pamerayascita.
  - d. Kajabutan, makadi kerandahin.
2. Sehananing sane marupa dedandan, jawat artha, miwah sane siosan patut ngeranjing ke Desa miwah Banjar.
3. Sehananing, utawi salwir lwir pamidana miwah dedandan, sane katiwakang, keaptiang mangda tepet ring gagoet pamelahning wicara, sekadi ;
  - a. Kretaning bhumi : Undang undang sane ngatur pertanahan/ Agraria.
  - b. Kretaning Negara : Undang Undang Dasar 1945, miwah peraturan-peraturan Pemerintah sane siosan.
  - c. Sima kreta : Awig Awig Desa Adat Kebung, pamoat ring tepengan :
    1. Tata krama/tata susila, mapolah maprawerti.
    2. Sima krama, mapidabdab, melaksana

sane becik tur rahayu, majeng ring sa-sakrahing krama Desa samian.

3. Desa krama, negegang, ngewangiang, ngematmiang, sehananing pamarggi pa aci-aci, pamoat ring Kahyangan Desa miwah Pedadyan ring sajabag Desa Adat Kebung.

### SARGGA XIX.

Indik larangan-larangan Desa Adat Kebung.

PAWOS 73.

PALET I.

1. Sahananing Kebayan Desa Adat Kebung tan kapatut/kelarang, lwire ;

- a. Nyulubin longlongan miwah panyemuhan.
- b. Ajujuden lewihnyane makekembaran.
- c. Mapepunyahan, miwah sarwwa bhaksa.
- d. Magegarapan sawa.
- e. Matetegenan sawinaning tategenan mula drewe:
- f. Tan kapatut dados saksi, sangkaning krama suka, sawinaning kabuatang antuk sang mawang rat.
- g. Tan kapatut sareng magebagan.
- h. Sirep di marggi-marggi.

2. Yan wenten salih tunggil Kabayan Desa mamurug, sangkaning tan meha wenang ke prayascita. Yan sangkaning meha, wenang ke prayascita, tur katiwakin danda antuk Prajurun Desa, mehageng : Rp. 4500 , apan sisip lenge ring swadharma. Yan ngantos ping tiga mamurug wenang keraryyanang antuk krama Desane.

PALET II.

Prajurun Desa.

Pra jurun Desa tan kapatutang wiadin kelarang :

- a. Niwakang pematut&kaputusan, se kama-kama marep ring krama Desa.
- b. Niwakang/mamutus pitungkas-pitungkas krama Desa, tan anut ring daging Awig Awig miwah dresta-dresta, lewihnyane mapilih kasih utawi mepailon.
- c. Nuduk uruman-uruman jawat artha miwah reramon, tan sangka-

- ning pahadungan/keputusan perareman.
  - d. Ngengkebang/ngaletlet saraja drewen Desa.
- Yan wenten Prajurit Desa mamurug kadi inucapingajeng wenang dar~~da~~ antuk krama Desa, Yan ngantos ping tiga mamurug, wenang keraryanang.

### PALET III.

#### Krama Desa Adat Kebung.

Sahananing krama Desa Adat Kebung, keaptiang mangda stata nge-matmiang daging Awig Awig Desa Adat Kebung, miwah dresat-dresat sane manut lingning agama Hindu ring tepengan mangulati kahita wasanan miwah kasukretaning Desa. Rehing asapunika awanan tan kapatut utawi kelarang :

#### I. Pitra Yadnya :

- Tan wenang amendem, miwah angupakara sawa ritekaning dina larangan, kadiangganing "Purnama Tilem" tanggal panglong, sapisan, prewanining tanggal miwah panglong, makadi dina larangan, sekadi; Buddha Kliwon, Buddha Wage, Anggara Kliwon, Saniscara Kliwon, Redite Umanis, Sukra Pon, Saniscara Kliwon", Semut sadulur, ngaran. Sukra Kliwon, Saniscara Umanis, Redite Paing, Ika kala gotongan, ngaran. Ring dora, miwah Wrespati manuju tanggal panglong, sapisan, miwah ping kutus, ingkel wong, Punika dina larangan ngupakara sawa/atiwa-tiwa.

Yang wenten salih tunggil krama Desa mamurug dina ringajeng wenang katiwakin danda antuk Prajurit Desa meageng : Rp. 9.000,-.

#### II. Sukretaning tata pawongan :

Yan wenten salih tunggil krama Desa, melancirin ring Desa, wenang danda : Rp. 9.000,-. Yan wenten krama Desa ngracinin ring Desa, sekadi :

- mepemarggi tarahayu, upami : ngrusak anak luh larangan, wenang danda Rp. 40.000,- saha mangda ngambil.
- Ngerabining wong arabi, wenang kapisisip, tur katiwakin danda Rp. 40.000,- saha katur ring Pemerintah.
- Mamurug tata susilaning kemanusiaan, wenang kapisisip, tur katiwakin danda : Rp. 4.500,-.
- Manguman uman ring sabha, wenang kapisisip tur katiwakin danda Rp. 2.500,-.
- Sahanan pemargi-pemargi sane kasinenggeh dusta krama, wenang kapisisip tur danda : Rp. 5.000,-

- Salah timpal, wenang kapisisip tur ktiwakin danda : Rp. 9.000,-, saha marisudha Desa sapatut ipun.
- 2. Sinalih tunggil yan wenten krama Desa, mamurug tata treptining Desa, lwire ;
  - Nambah ngrereh jangkrik, tamuati ring marggi-marggi, rurung-rurung, Ksetra, miwah jejaban pura-pura miwah sane siosan, keaptiang saskrahing krama Desa sane memanggihin, mangda nyadokang ring Prajuritun Desane, tur patut kapisisip saha katiwakin danda meageng : Rp. 2.500,-.
  - Yan wenten krama Desa sane, ngaletlet bebaledan, rurung-rurung margi miwah tanah ksetra, makadi jejaban Pura-pura, tanah-tanah krama Desa siosan, wenang kapidana tur katiwakin danda : Rp. 2.500,-

#### Rerampagan/ngerandahin.

1. Sinalih tunggil yan wenten krama Desa rangkung ring tigang sasih, nyedokin/amandal tan naur paturunan, panikel paturunan, dedandan, wenang kerandahin antuk krama Desa sane kaenterang antuk Prajuritun Desa.
2. Buat tatacaraning ngerandahin, kapatut kadi ring sor puniki :
  - Kelaksanayang antuk Prajuritun Desa miwah Banjar, tur kasarengin antuk krama Desa pinaka saksi meakweh tigang diri.
  - Sang ngerandahin/ngerampang, mangda sangkaning darsana, ngambil barang-barang sane kerandahin akwehnyane, manut ring ageng alitning utang krama Desane sane tan nawur urunan, wiyadin panikel, miwah dedandan. Utawi nyawenin tanem tuwuh miwah wewangunan sane kerandahin.
  - Sang kerandahin tan dados ngalangin, pemargin sang ngerandahin saha tan mari sareng nyaksinin pemargin sang ngerandahin.
  - Prajuritun Desa miwah Banjar, miteketin mangda barang-barang rerandahane, gelis katebas masengker masue 10 (adasa rahina) ring rahinanyane pacang kalelang.

#### SARGGA XX.

Nguwah Uwuhin Awig - Awig.

#### PAWOS 74.

1. Nguwah Uwuhin Awig - Awig Desa Adat Kebung puniki, patut kelaksanayang antuk paruman Desa, sane katedunin antuk krama Desa langkung ring atenga.

2. Pamutusing bebaos mangda kedarin antuk, guluk briyuk sapangul, sajroning pesamuan.

## SARGGA XXI.

Pamuput.

PAWOS.75.

1. Awig-Awig puniki kewastanin Awig-Awig Desa Adat Kebung. Saha ngawit kemargiang saking duk : Rahina  
Tur sampun kasetujuin antuk : Prajuritun Desa miwah Banjar, manut tanda tangan ring sor puniki.
2. Salwiring sane durung mungguh ring Awig Awig puniki, patut kemargiyang, manut tata cara sane sampun ketah memargi, tur saha patut kadulurin antuk perareman-perareman Desa miwah Banjar.
3. Sakalwir sane durung wenten sadurungnyane, patut keanutang ring daging Awig-Awig Desa Adat Kebung puniki.
4. Awig-Awig puniki, kalingga tanganin antuk Bendesa Adat Kebung ( Kelihan Desa Adat ) tur krentebin antuk Kelihan Banjar, miwah Kelian Dinas.

## P A W E W E H

### TATA CARANING PATEDUNAN

1. Sanunggil Krama Desa Adat kalih Banjar tedun patut - ngangge janggi, tur mangda nyaput, semangdene manggeh-ciri khas Baline.
2. Rikala Krama Desa kalih Banjar parum minakadi tedun - patut ngangge dedosan.
3. Yan tedun maboat, becik Desa Adat minakadi Banjar luh Kelian Dinas, wenten Pemerintah jaga rauh semangdene - para jurun Desa kalih Klian Banjar mangda yakti-yakti merintahanag saya arahe mangda ngarahin para sinomane tur para klian-klian Desa kalih klian Banjar mangda - tedun, yan tan tedun keni DEDOSAN.
4. Yan saya arah nenten ngemargiang tugas-tugas nyane talar keni DANDA.



5. Yan wenten sinalih tunggil ikrama Desa kalih Banjar nulak pituduh Klian klian ika wenang danda.
6. Sinalih tunggil prajurun Desa kalih Banjar yan tan ngemargiang sekadi daging kekecap Awig-awig puniki, ika wenang danda.

#### INDIK DEDOSAN PATEDUNAN

1. Yan telas toyan janggine apisan punika kewastanin - janggi pemargi.
2. Yan telas ring ping kalihe punika sampun ngeninin - kepalukan (kekasepan) keni gung artha Rp.50,-
3. Yan ring kaping tigane ngeninin gung artha Rp.100,-
4. Kapatutan pemargin ngunggahang janggi tan kawenang ngunggahang langkungan ring ping tiga (3 x).
5. Yan wenten ikrama Desa kalih Banjar rauh ring sampun ngawitin mebebaos kalih mekarya punika keni dosa weweg manut ageng alit dedosan ipun.
6. Yan tedun sangkep kalih tedun mebaos minakadi tedun mekarya sane ingan ingan dedosan ipun Rp.200,-
7. Yan tedun mebaos kalih mekarya sane maboat dedosan ipun Rp.500,-
8. Yan wenten Klian klian Desa kalih Banjar nenten tedun rikalaning wenten baosang kalih karyanin taler keni dosa gung artha Rp.100,-
9. Yan saya arahe nenten ngemargiang swadharman nyane, kawenang danda gung artha Rp.1.700,- yan tan ngarah in sinoman Desane kalih Banjar,kepatutan saya arah-punika naurin dedosan sane tan kearahin.
10. Yan wenten krama Desa kalih Banjar minakadi prajuru atiwa-tiwa tan manut kalih nenten ngemargiang sekadi sane munggah ring daging Awig awig puniki, ika wenang danda gung artha Rp.9.000,- tur kawusanang (kapatutan) dados prajuru.
11. Yan krama Desa kalih krama Banjar nenten ngemargiang swadharmaning patedunan luire : tan ngangge saput (nyaput) wenang danda gung artha Rp.1.700,-
12. Yan krama Desa miwah krama Banjar ngardinin kerician

8. Wesning  
I Wayan Wesning  
Klian Br. Kangin

9. Rarna  
I Wayan Rarna  
Klian Br. Kawuh

10. Tista  
I Wayan Tista  
Klian Br. Kangin

11. Kelid  
I Wayan Kelid  
Klian Br. Kawuh

12. Danta  
I Kt. Danta.  
Klian Br. Kangin

13. Rati  
I Wayan Rati  
Klian Br. Kawuh

14. Nengah Degdeg  
I Nengah Degdeg  
Klian Br. Kangin

15. Karya  
I Kt. Karya  
Klian Br. Kawuh.

KELIAN DINAS KEBUNG,

( I G d e P a s e k . )

S A K S I S A K S I :